

**Aningaasarsianit akileraarutit pillugit Inatsisartut  
inatsisaataallanngortinneqarnera pillugu Inatsisartut  
inatsisaat  
(Soraarnerussutisiaqalernissamut aningaasaatit  
Kalaallit Nunaanni angerlarsimaffeqartut  
akileraaruserneqartarnerat, soraarnerussutisiassanit  
naafferartumik annertoqqatigiimmik  
tunniunneqartartussanit soraarnerussutisiassanik  
nuussineq, akileraarutitigut sumut  
attuumassuteqarnermut tunngasut aamma  
avataaneersunut sulisussanut, Namminersorlutik  
Oqartussat sinnerlugit mittarfiliassanik suliaqartunut,  
ilanngaasiinnginnermi akileraarutitut  
aaqqissuussineq)**

**§ 1**

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaanni nr. 11, 15. november 2007-imeersumi, Inatsisartut inatsisaanni nr. 9, 5. december 2008-imeersumi, Inatsisartut inatsisaanni nr. 20, 18. november 2010-imeersumi, Inatsisartut inatsisaanni nr. 37, 9. december 2015-imeersumi, Inatsisartut inatsisaanni nr. 29, 28. november 2016-imeersumi aammalu kingullermik Inatsisartut inatsisaanni nr. 18, 26. juni 2017-imeersumi allanngortinneqartumi, makkua allanngortinneqarput:

**1. § 28, imm. 3-imi, uniffiup aappaatut nutaatut ikkunneqarpoq:**

”Soraarnerussutisiaqartitsinnermi aningaasaateqarfiit, uniffimmi siullermi taaneqartut, aammattaaq soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaat naapertorlugu iluanaarutitut akileraarusiinermut matussutissatut illuartitat ilanngaatisinnaavaat.”

**2. § 39 c imatut oqaasertalerneqarpoq:**

”§ 39 c. Soraarnerussutisianut aaqqissuussinernit soraarnerussutisiassat, soraarnerussutisianut ingerlatseqatigiiffimmit Kalaallit Nunaanni angerlarsimaffeqartumit, soraarnerussutisianut ingerlatseqatigiiffimmut Kalaallit Nunaanni angerlarsimaffeqarani sillimmasiisarfiit pillugit inatsimmi

pineqartunut ilaasumut aammalu Finanstilsyn-ip akuerisimasaanut, nuunneqarneranni, naafferartumik annertoqqatigiinnik tunniunneqartartussanik sillimmasiissuteqarneq pilersinneqareersimasooq soraarnerussutisianik pisinnaatitaasup imaluunniit sillimmasertittup uppersarsinnaappagu, isertitat akileraaruteqaataasussat naatsorsorneqarneranni, soraarnerussutisiaqalernissaq siunertaralugu naafferartumik annertoqqatigiinnik tunniunneqartartussanik sillimmasiissummit, soraarnerussutisianut ingerlatseqatigiiffimmi Kalaallit Nunaanni angerlarsimaffeqarani, sillimmasiisarfiit pillugit inatsimmi pineqartunut ilaasumi aammalu Finanstilsyn-ip akuerisimasaani, pilersinneqarsimasumit, tunniunneqartut ilaatinneqassanngillat. Tamanna soraarnerussutisiassanut annertoqqatigiinnik tunniunneqartartussanut toqqorsivimmit tunniunneqartunut, soraarnerussutisianut aaqqissuussinernit soraarnerussutisiassat nuunneqarnerannut ilaatillugu nuunneqartunut taamaallaat atuuppoq, ilanngullugit toqqorsiviup taassuma erniaannit tunniussinerit.

*Imm. 2.* Akiliutit soraarnerussutisianut aaqqissuussinernit soraarnerussutisiassat nuunneqarnerat qaammatinik 4-inik sioqqullugu isumaqatigiissummi allassimasumit akileraaruteqannginnermi qaffasinnerusumik aningaasartaqanngippata, toqqorsiviup soraarnerussutisianut aaqqissuussinernit soraarnerussutisiassat nuunneqarnerannut ilaatillugu nuunneqareernerata kingorna soraarnerussutisianut annertoqqatigiinnik tunniunneqartartussanut toqqorsivimmut akiliuteqartoqarpat, aamma *imm. 1* toqqorsiviup ilaanut akiliutinit taakkunannga annertusitinneqartumut atuutissaaq. Ataatsimoorussamik sulisartunut isumaqatigiissuteqarnermi isumaqatigiissutigineqarpat akiliinerit aningaasarsiat procentianik naatsorsorneqartassasut, akiliutit soraarnerussutisianut aaqqissuussinernit soraarnerussutisiassat nuunneqarnerat qaammatinik 4-inik sioqqullugu isumaqatigiissummi allassimasumit aningaasarsianit procentiliussaq qaffasinnerusimanngippat, *imm. 1* aamma atuutissaaq. Annertoqqatigiinnik tunniunneqartartussanut sillimmasiissuteqarneq pillugu isumaqatigiissut, soraarnerussutisianut aaqqissuussinernit soraarnerussutisiassat nuunneqannginneranni qaammatinik 4-inik kingusinnerusumi pilersinneqarsimappat, akiliinerit akileraaruteqannginnermi qaffasinnerusunik aningaasartaqassanngillat aamma pilersitsinerup nalaani isumaqatigiissummi allassimasunit aningaasarsianit procentiliussaq qaffasinnerussanani. Soraarnerussutisianut aaqqissuussinernit soraarnerussutisiassat nuunneqannginneranni qaammatinik 4-inik kingusinnerusumi ataatsimoortumik sulisartunut isumaqatigiissuteqarnerup malitsigisaanik aningaasartat imaluunniit procentiliussaq allanngortinneqarsimappat, akiliinerit akileraaruteqannginnermi qaffasinnerusumik aningaasartaqassanngillat imaluunniit aningaasarsianit procentiliussaq isumaqatigiissuteqarnermi allassimasunit qaffasinnerussanani. Isertitat akileraaruteqaataasussat naatsorsorneqarneranni annertoqqatigiinnik tunniunneqartartussatut sillimmasiissummit tunniussinerit ilaatinneqarsinnaasimanngippata, § 39 b aamma § 67 a taamaaqataanik atuutissapput.

**3. § 68, *imm. 2*-imi nr. 7** imatut oqaasertalerneqarpoq:

”7) inuk atorfeqarnerminut ilaatillugu illoqarfiit nunaqarfillu avataanni imaluunniit Namminersorlutik Oqartussat sinnerlugit mittarfiliornerni sanaartugassanut pilersaarusiornermut suliasanut, illuliortiternermut sanaartornermullu suliasanut kiisalu innaallagialersuinnermut ikkussuinnermullu suliasanut atatillugu suliasanik suliaqartoq, takuuk § 72 a, *imm. 1*, aammalu sulisoq taanna nunami maani qaammatini siuliini 6-inik kingullerni kommunimut akileraartussaataasimanngitsoq, imaluunniit”

**4. § 72 a, *imm. 1*-imi** uniffik siulleq imatut oqaasertalerneqassaaq:

”Inuit akileraartussaataasut, illoqarfiit nunaqarfillu avataanni imaluunniit Namminersorlutik Oqartussat sinnerlugit mittarfiliornerni sanaartugassanut pilersaarusiornermut suliasanut, illuliortiternermut

sanaartornermullu suliassanut kiisalu innaallagialersuinnermut ikkussuinnermullu suliassanut atatillugu suliassanik suliagartut aammalu nunami maani qaammatini siuliini 6-inik kingullerni kommunimut akileraartussaataasimanngitsut atorfeqarnerminni isertitamik 35 procentiannik Nunap karsianut inaarutaasumik akileraaruteqassapput (ilanngaasiinnginnermi akileraarut).”

## § 2

Inatsisartut inatsisaat ulloq 1. december 2017 atuutilerpoq

*Namminersorlutik Oqartussat, ulloq 23. november 2017*

Kim Kielsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut